



Broj predmeta: 02-000049/20
Broj akta: 01.1-1141SM-270/20
Datum, 22.5.2020. godine
Mjesto, Brčko

Na osnovu člana 16. i člana 17. Zakona o Vladi Brčko distrikta Bosne i Hercegovine („Službeni glasnik Brčko distrikta BiH“, broj: 22/18 – prečišćeni tekst, 49/18, 8/19, 10/19 i 32/19) i Odluke o imenovanju Štaba za zaštitu i spašavanje Brčko distrikta BiH, broj predmeta: 02-000049/20, broj akta: 01.11-0566LO-006/20 od 13. 3. 2020. godine, broj akta: 01.11-0566LO-012/20 od 13. 3. 2020. godine i broj akta: 01.11-0566LO-020/20 od 16. 3. 2020. godine, a u skladu s članom 18. tačkom o), članom 19. tačkom a), članovima 35. i 37. stavom (1) Zakona o zaštiti i spašavanju ljudi i materijalnih dobara od prirodnih i drugih nesreća u Brčko distriktu Bosne i Hercegovine („Službeni glasnik Brčko distrikta BiH“, broj: 29/16 i 33/16), Odlukom o proglašenju stanja prirodne nesreće zbog COVID-19 (korona virus), broj predmeta: 43-000096/20, broj akta: 01.1-1141SM-001/20 od 13. 3. 2020. godine, u vezi s Odlukom o proglašenju ugroženosti stanovnika Brčko distrikta BiH od epidemije zarazne bolesti – korona virusa (COVID-19), broj predmeta: 02-000049/20, broj akta: 01.11-0566LO-001/20 od 11. 3. 2020. godine i broj akta: 01.11-0566LO-003/20 od 12. 3. 2020. godine, članovima 5. i 6. Poslovnika o načinu rada i rukovođenju Štabom za zaštitu i spašavanje Brčko distrikta BiH, broj predmeta: 02-000057/20, broj akta: 01.11-0566LO-004/20 od 20. 3. 2020. godine i broj akta: 01.11-1161DS-010/20 od 23. 4. 2020. godine, na prijedlog Odjeljenja za zdravstvo i ostale usluge od 22. 5. 2020. godine, nakon održane telefonske sjednice Štaba, komandant Štaba, gradonačelnik Brčko distrikta BiH dana 22. 5. 2020. godine i z d a j e

N A R E D B U

Član 1.

Ovom naredbom donose se epidemiološke preporuke za rad igraonica i rođendaonica za djecu tokom epidemije COVID-19.

Član 2.

Prije početka rada igraonica i rođendaonica za djecu potrebno je provesti pranje, čišćenje i dezinfekciju prostora, pribora i opreme, kao i provjetravanje prostorija.

Član 3.

Zaposlenima u slučaju povišene temperature ili drugih simptoma zarazne bolesti (kao kašalj, bol u grlu, otežano disanje, malaksalost, bol u mišićima, proliv, povraćanje...), bilo sa povišenom temperaturom ili bez nje, savjetuje se da telefonom kontaktiraju doktora porodične medicine i da ne dolaze na posao.

Član 4.

Na ulazu u prostor igraonice i rođendaonice neophodno je postaviti jasne i vidljive poruke u vezi s ličnom zaštitnom opremom i načinom postupanja u objektu i poštovanjem rastojanja fizičke distance.

Član 5.

Zaposlenicima se temperatura mjeri prilikom dolaska na posao beskontaktnim toplomjerom, osobe koje imaju temperaturu višu od 37,2 °C vraćaju se kući.

Član 6.

Obavezno je nošenje maske za zaposlene.

Član 7.

Osigurati dozatore sa sredstvom za dezinfekciju ruku na bazi 70% alkohola na ulazu u prostor igraonice i rođendaonice.

Član 8.

Prilikom dolaska i odlaska djece u igraonice i rođendaonice neophodno je uspostaviti procedure kontrolisanog ulaska djece kako se ne bi stvarala gužva i kako bi se osigurali, koliko je god to moguće, preporučena distanca među djecom od 2 metra i organizovanje prihvata djece na ulazu u unaprijed dogovorenim intervalima.

Član 9.

Djeca i osobe koje dovode djecu u igraonicu i rođendaonicu treba da su **zdrave** (da nemaju akutne simptome respiratornih ili drugih infekcija – povišenu tjelesnu temperaturu, otežano disanje, kašalj, kihanje, glavobolju, mučninu, povraćanje, proliv ili su pod rizikom da su bili u kontaktu sa osobama pozitivnim na COVID-19).

Član 10.

Osobama koje dovode djecu u igraonicu i rođendaonicu zabranjen je ulaz u prostorije dječije igraonice, moraju nositi masku pri dolasku, treba da su mlađe od 65 godina starosti i treba da od drugih osoba ispred ulaza u igraonicu/rođendaonicu drže međusobno rastojanje od dva metra.

Član 11.

- (1) Potrebno je sprovoditi strogu trijažu djece pri prijemu u objekat.
- (2) Osoba koja obavlja trijažu treba da, ukoliko je imala kontakt sa djetetom, opere ruke toplom vodom i sapunom i da ih dezinfikuje.

Član 12.

- (1) Djeci mjeriti temperaturu prije ulaska u igraonicu/rođendaonicu.
- (2) Toplomjer nakon svakog mjerenja obrisati alkoholnom maramicom ili dezinficijensom.
- (3) Pri svakoj sumnji na postojanje infektivne bolesti, ili ako je povećana temperatura, dijete ne primati u igraonicu/rođendaonicu.

Član 13.

Preporučuje se da kod kuće ostanu i djeca sa hroničnim bolestima (respiratornim, kardiovaskularnim, malignim, dijabetesom ili imunodeficijencijama...), kao i djeca čiji roditelji imaju ove bolesti.

Član 14.

Zaposlene kod kojih su prisutni simptomi bolesti vezani za COVID-19 ili imaju neke druge zarazne bolesti treba odmah udaljiti s radnog mjesta.

Član 15.

- (1) Zaposleni u dječjim igraonicama/rođendaonicama moraju da imaju osim ličnih zaštitnih sredstava – maski i čistu radnu odjeću i obuću (redovno pranje i peglanje radne odjeće na temperaturi višoj od 60°C).

- (2) Osigurati dovoljne količine lične zaštitne opreme (maska se mijenja svaka 2-3 sata), radne odjeće i obuće za zaposlene.

Član 16.

- (1) U skladu s preporukom fizičkog distanciranja, boravak djece organizovati tako da se međusobni kontakt djece maksimalno izbjegne, u skladu s mogućnostima: planirati vrijeme za igru uz organizovanje igara u manjim grupama, pokušati osigurati u što većoj mjeri fizički razmak među djecom.
- (2) Fizički razmak neophodno je podsticati, ali je za očekivati da će često to biti teško izvodivo, u zavisnosti od dobi i zrelosti djeteta.

Član 17.

- (1) Ograničiti broj djece koja borave u igraonici/rođendaonici tako da na 10 m² može da bude jedno dijete.
- (2) Preporučuje se što kraći boravak djece u igraonici/rođendaonici (ako je u zatvorenom prostoru).
- (3) Ukoliko djeca nose maske (odnosi se isključivo na djecu stariju od 2 god.) moraju biti pod strogim nadzorom.
- (4) Zabranjeno je da djeca u igraonicama/rođendaonicama konzumiraju i/ili među sobom dijele hranu.
- (5) Flaše/čase s vodom/sokom koje djeca koriste zabranjeno je dijeliti s ostalom djecom.

Član 18.

Pojačati higijenske mjere u cijelom objektu, uz češću primjenu mjera dezinfekcije prostora, površina i predmeta, uključujući igračke, površine i predmete koji se često dodiruju (prekidači za svjetlo, ključevi, ručke ormarića, umivaonici, stolovi, stolice, rekviziti za igranje...).

Član 19.

- (1) Ne koristiti igračke koje se ne mogu prati i dezinfikovati, posebno mekane (plišane, platnene) igračke.
- (2) Ne miješati igračke između grupa djece prije nego što se operu i dezinfikuju.
- (3) U slučaju da djeca stavljaju igračke u usta ili u slučaju povraćanja, osoblje mora ukloniti igračke, staviti ih u posudu s deterdžentom za pranje i odložiti u zasebnu prostoriju. Prostor na kome su bile oprati i dezinfikovati.
- (4) Pri pranju i dezinfekciji obavezno nositi jednokratne rukavice koje se nakon toga skidaju i odlažu u kantu za otpad.
- (5) Uspostaviti jasnu proceduru za pranje, dezinfekciju i odlaganje čistih i „prljavih“ korištenih igračaka, kako bi se spriječilo njihovo ukrštanje.
- (6) Pranje i čišćenje igračaka obavljati van domašaja djece.

Član 20.

- (1) Neophodno je osigurati u objektu pribor za čišćenje i dovoljnu količinu sredstava za pranje i dezinfekciju površina i za ličnu higijenu.
- (2) Uvesti obavezno pranje ili dezinfekciju ruku zaposlenih prilikom ulaska u objekat, kao i pranje ruku djeci pri prijemu u prostorije, pri tom uvesti obavezan nadzor pri pranju ruku djece.
- (3) Posebnu pažnju treba obratiti na potrebu pojačanih higijenskih mjera u slučaju pranja, umivanja ili držanja u naručju djece, nakon kihanja, kašljanja, plača djece.
- (4) U slučaju pružanja pomoći pri pranju ruku djetetu, osoblje mora obavezno nakon toga oprati i dezinfikovati svoje ruke.
- (5) Koristiti sredstva za pranje koja se uobičajeno koriste, preporučuje se pranje ruku običnim sapunom i vodom, jer je mehaničko djelovanje efikasno u uklanjanju vidljivih zaprljanosti ruku i mikroorganizama.
- (6) Uz postojeće umivaonike neophodno je osigurati i posude sa sredstvima za dezinfekciju ruku i kante za otpad s poklopcem na pedalu.

Član 21.

- (1) Pri korištenju dezinfekcionih sredstava voditi računa o pravilnoj primjeni u skladu s uputstvom proizvođača, vezanim za namjenu, koncentraciju, način primjene i neophodno kontaktno vrijeme.
- (2) Podaci o sigurnosti korištenih sredstava u vezi s načinom primjene, skladištenja i dodatne informacije i upozorenja vezana za njihovo štetno djelovanje na zdravlje ljudi naznačena su na etiketi proizvoda.

Član 22.

- (1) Pribor i sredstva za čišćenje i dezinfekciju moraju se držati van domašaja djece i ne smiju se primjenjivati u neposrednoj blizini djece, kako bi se izbjeglo udisanje eventualnih isparenja.
- (2) Čišćenje i dezinfekcija prostora u kojem su boravila djeca vrši se nakon njihovog preuzimanja (odlaska) iz objekta.

Član 23.

- (1) Čišćenje vodom i deterdžentima koji se koriste u domaćinstvu i upotreba uobičajenih dezinficijenasa dovoljni su za čišćenje i dezinfekciju u dječjim igraonicama/ rođendaonicama.
- (2) Preporučuje se da se u igraonicama/rođendaonicama za djecu češće čiste slavine, igračke, ručice i tipke za vodene česme), te ih treba očistiti i dezinfikovati u skladu s protokolima za čišćenje površina s visokim dodirrom, a prema standardnim postupcima za rutinsko čišćenje, dezinfekciju i zbrinjavanje otpada u objektima za boravak djece.

Član 24.

Ako proizvodi za čišćenje kućanskih ili komercijalnih sredstava nisu lako dostupni, podne i radne površine mogu se dezinfikovati smjesom 1 dijela izbjeljivača (5% natrijevog hipohlorita) i 9 dijelova vode, potrebno kontaktno vrijeme za dezinfekciju je jedna minuta.

Član 25.

U skladu s preporukama proizvođača elektronski uređaji visokog dodira (npr. tipke, tableti, pametne ploče) mogu se dezinfikovati 70% alkoholom (npr. alkoholne maramice) osiguravajući za dezinfekciju kontaktno vrijeme s površinom od 1 minute.

Član 26.

- (1) Redovno, u skladu s vremenskim prilikama, prirodnim putem — otvaranjem prozora provjetravati prostorije.
- (2) Ne koristiti vještačku ventilaciju ni klima-uređaje.

Član 27.

- (1) Provoditi pojačane edukativne aktivnosti s djecom, s ciljem lakšeg razumijevanja i usvajanja novih pravila postupanja vezanih za značaj čestog i pravilnog pranja ruku (minimum 20 sekundi — npr. uz neku pjesmicu), kašljanje i kihanje u podlakticu, socijalno distanciranje koje treba osmisliti kroz igru djece (razmjestiti ih da na udaljenosti jedne od drugih, npr. da vježbaju da rašire ruke i „mašu krilima“ tako da se ne dodiruju, da izbjegavaju dodirivanja prstima lica, usta, nosa).
- (2) Djecu treba učiti da tokom kašljanja ili kihanja prekriju usta i nos maramicom ili savijenim laktom i da potom upotrijebljenu maramicu odlože u kantu za otpad, a nakon toga operu ruke.
- (3) Na vidnim mjestima postaviti edukativne postere s preporukama o preventivnim aktivnostima.

Član 28.

Ova naredba stupa na snagu danom donošenja, a objavit će se u „Službenom glasniku Brčko distrikta BiH“.

DOSTAVITI:

1. Uredu gradonačelnika
2. Zamjeniku gradonačelnika
3. Glavnom koordinatoru Vlade Brčko distrikta BiH
4. Svim odjeljenjima Vlade (12x)
5. Sekretarijatu Vlade (3x)
6. Odjeljenju za zdravstvo i ostale usluge
– Pododjeljenju za javno zdravstvo
7. Uredu za upravljanje javnom imovinom Brčko distrikta BiH
8. Uredu gradonačelnika / Inspektorat
9. Policiji Brčko distrikta BiH
10. Članovima Štaba (34x)
11. Ministarstvu sigurnosti BiH, terenski centar Brčko
- Služba za rad sa strancima, Trg mladih br. 8
12. Ministarstvu sigurnosti BiH – Granična policija BiH
13. Institucijama Brčko distrikta BiH (8x)
14. Crvenom krstu/križu Brčko distrikta BiH
15. Javnim preduzećima, fondovima i Zavodu (7x)
16. „Službenom glasniku Brčko distrikta BiH“
17. Arhivi.

GRADONAČELNIK

Mr. sc. Siniša Milić